

canele et zenzari; et haveano pagato il piper 120, zenzari 22, canele 50, cassia etc. Et dize, in Alexandria erano oglij assai, portati li con nave ragusee. *Item*, era fama in la Morea, che turchi haveano l'ochio a Napoli di Romania.

*Da Corphù, dil provedador di l'armada, sier Hironimo Contarini.* Cosse replicade; et che erano venute zente a Durazo, per causa dil re di Spagna ch'è a Napoli; sollicita si armi, et che è con pochissime galie etc.

*Da Traù, di sier Bernardin Contarini, conte.* Come di note tempo, hessendo reduti zercha 4000 bestiami in li borgi dil castello dil vescovo a la marina, perchè intendevano di certa coraria si dovea far per turchi, e posto le zente inutile nel castello e le utile ne li borgi, or con astuzia turchi fono aperti e introno, prese li anime numero 20, et tutti li animali, et le conduseno via etc.

*Di Napoli, di 12, di oratori nostri, sier Zorzi Pizani, dottor, cavalier, sier Marco Dandolo, dottor, cavalier, sier Cabriel Moro, el cavalier.* Come era stà expedito domino Bartolomeo Alviano dal re, et datoli, in loco dil duchato di San Marco in Calabria, do contadi in l'Abfuzo, *videlicet* el duchato de Buchianicho et el contado de Mala Pelle, con promessa de suprir a quanto manchasse a la summa de l'intrada l'havea dil sopradito duchato. *Item*, erano stà designati 3 oratori a Roma, al papa, *pro prestanda obedientia*, et per haver la investitura del regno etc., *videlicet* el comandador de Montisa, el doctor Augustino, domino Hironimo de Vico. *Item*, era zonto uno orator dil re di Portogal, *pro congratulatione de incolumi adventu in regno* de sua alteza; et Consalvo Ferando li andò contra, *nomine regio*. *Item*, zercha le ripresaje, speravano adatar la cossa, justa li aricordi di la Signoria, *videlicet* si pagasse nostri una per 100, et l'horò 2 per 100 etc.; *cætera secretiora fuerunt*.

*Di Franza, di sier Alvixe Mozenigo, el cavalier, orator nostro, date a Burges.* Come il re aspetava 6000 sguizari, et se fazea in quelle confine 6000 fanti, se conducea bon numero de artilarie per la expedition di Zenoa; si parlava per qualche uno, dite preparatione farse a' danni nostri. Le letere è di primo e di 3 marzo. Et nota, ha con soa maestà lanze bon numero, *ut in litteris*.

*Da Milan, di Nicolò Stella, secretario, di 9.* Come i oratori zenoesi haveano rezercato haver salvo conduto dal gran maistro, e *tamen*, poi habuto, non erano zonti; se giudicava fosseno mutati de proposito. Se preparava artilarie trate di castello,

*videlicet* canoni sei et altre, per la impresa di Zenoa. Dito gran maistro era andato a Pavia, e de li se transferiva in Aste, dove, conzonto con le gente preparate, anderia verso Zenoa. De Simon Rigom altro non era seguito; se aspetava ordene de la regia maestà, a la qual per zornata era stà mandà el processo et examination fate. *Item*, domino Zuanne Bentivolo se aspetava li a Milan, per lontanarse miglia 100 da Bologna, a ziò lo interdito dil papa non impedischa quele terre et loci più vicini; el qual anderia a star verso Pavia. Suzonze *etiam*, parlarse che questa venuta di la christianissima maestà era da dubitar per nui etc. 12\*

*Di Germania, di sier Piero Pasqualigo, dottor et cavalier, orator nostro, di 29 fevrer, di Argentina.* Li se trovava la cesarea maestà, per seguir el camino verso Bergogna. Erano zonti oratori di Olanda, Fiandra, et di loci subieetti al *quondam* archiducha, qualli doveano jurar fideltà al fiol de dicto *quondam* archiducha. La maestà di la regina era andata a Costanza, per la dieta se preparava li, e starà loco tenente a dicta dieta, per fina el zonzar li di la cesarea maestà. Et come li si ritrova la fiola, madama Margarita, fo moglie dil duca di Savoia, et maridata nel re di Ingiltera; con la qual sua maestà havea fato uno zocho a' schachi, de memoria, presente esso orator nostro. *Item*, domino Constantin Arniti havea habuto audientia, *tamen* non era stà expedito. *Item*, che a Guanto era stà decapitato uno, che andava sussitando i populi che non se desse a la cesarea maestà etc. *Item*, il re andava temporizando l'andata im Bergogna, per la venuta di Franza in Italia.

*Di Hongaria, da Buda, di Vincenzo Guidoto, secretario.* O da conto. Zercha il cardinal Ystrigonia, ringratia la Signoria quello l'ha operato zercha il patriarcha' di Constantinopoli, che l'cardinal renonciava, perchè fosse di esso Ystrigonia, a complacencia di la Signoria; *tamen* il papa non ha voluto, sì che aspeterà uno altro papa. *Item*, zercha i danari etc. Nota, l'orator hongaro parti di qui; e fo fato le letere de cambio di ducati 4000.

Et pur, cazado li papalista, sier Domenego Pixani, el cavalier, avogador di comun, venuto orator di Roma, referì la sua legatione, copiosa. *De etate pontificis, annorum . . . .*, colerico, à do egritudine: gote et Franza; à mal animo contra la Signoria nostra. *Item*, suo nepote, cardinal San Piero in Vincula, à fin qui intrada ducati 40 milia; et tien si adatarà di acetar il vescoo' di Vicenza, zonto che l' sia a Roma l'orator nostro Baduario etc. *Item*,